

Soraga Ladin Rock presenta sie prum Cd

L vegnarà prejentà da la sociazion, ensema al nef logo, con n concert a l'Hotel Arnika en vender ai 25 de firé



La Blood Rockers Band e la Ciantarines da Soraga en concert al Sporting de Pardac ai 22 de jené de chest an.

Musega - La sociazion culturèla "Soraga Ladin Rock" l'è l frut de n enconter no casual anter la "Blood Rockers Band", che tol ite dotores-musizisc che laora a l'Ospedèl Sènta Chiara de Trent e n grop de ciantarins del Grop de Folclor da Soraga. Da chesta union, envièda via de gra a l'amicizia anter l leader de la Band Massimo Ripamonti (de reisc da Soraga da man de sia mère) e l fort alpinist fascian Toni Valeruz, leé da na gran pascion per i monc che va endò tel temp, l'è nasciù l projet de conjobièr l'energìa del rock progressif coi sons del lengaz ladin e del vocalism coral.

L repertorie tradizionèl de la band l'è donca doventà più rich no demò de verscions (integrales o en pèrt) tel lengaz ladin de cognosciudes hits del rock classich (Bob Dylan, Lynyrd Skynyrd, Bruce Springsteen) ma ence de vèlch tòch originèl metù en musega su la paroles ladinè de Toni Valeruz che conta de sie particolarè raport coi monc.

Dò n prum concert live canche chesta formula é stata prejentèda

sperimentalmenter al publich te l'istà del 2010 a Soraga, l'è nasciù l'idea de sviluper l projet travers la costituzion de na sociazion culturèla, metuda sù formalmenter ai 17 de otober del 2010 con chela de sostegnir l'interpretazion, la valorisazion e la difujon de la musega populèra moderna, strumentèla e corèla, con particolarè enteress per l folk-rock tel lengaz ladin.

L grop che cianta che compagna la Blood Rockers Band à tout sù l'inom de "La Ciantarines da Soraga" ajache la femenés é de più che i omegn.

Anter i obietives de la sociazion l'è ence l sostegn a l'ativitèdes de la sociazions de volontariat, soraldut tel ciamp sanitàer. Na atenzion particulèra é outa a la sensibilisazion de la jent su l'importanza de la donazion del sanch e de la megola de os. Anter la ejibizions del grop recordon la partezipazion al concert a sostegn de l'ADMO, ensema al cognosciù grop trentin "The Bastard Sons of Dioniso", stat a Pardac ai 22

de jené passé.

L grop l'è dò che l'enjigna l prum EP-demo dal titol "L'om che va a crepes" con i tòc più segnificatives del repertorie de la "Blood Rockers Band" ensema a "La Ciantarines da Soraga". L Cd vegnarà prejentà e dat fora per nia ai mesi de informazion endèna la conferenza stampa che sarà en vender ai 25 de firé da les 18.00 te la senta de la sociazion aló dal Pluriuso de Soraga. Tolarà pèrt a la scontrèda Toni Valeruz vize president de la sociazion, Fabio Chiochetti, maester del Cor "La Ciantarines da Soraga" e comember del consei diretif e Massimo Ripamonti, leader de la Blood Rockers Band e president de la sociazion.

Te chesta ocazion vegnarà ence prejentà la tessera de adejion a la sociazion e l nef logo dessegnà da l'artist da Soraga Renato Decrestina. Amò apede vegnarà portà dant la scomenzadives culturèles e musicales per l'an 2011 e la serèda se serarà sù col concert da les 20.30 aló da l'Hotel Arnika de Soraga.